



Il nov possessor da la Pro Manufacta Engiadina, René Fritsch, ha svesta experienza da lavurar cun divers materials. Eir cuors d'elavurar lain vegnan sports.

fotografias: Pro Manufacta Engiadina

La Pro Manufacta Engiadina es in novs mans

Mantgnair inavant lavuors artischanas e tradiziunalas a Scuol

La Pro Manufacta Engiadina a Scuol ha mudà possessur.

L'intent da René Fritsch es da mantgnair inavant la spüerta da seminaris cun lavuors artischanas.

L'intent da la Pro Manufacta Engiadina a Scuol nun es be da mantgnair las veglias technicas dals mansterans, dimpersè eir da laschar d'vantar l'artischanadi ün'aventüra. Las participantas e'ls participants dal cuors survegnan ün'invisita illa cuschina regiunala, illas erbas ed illas masdinas indigenas.

Avant bundant duos ons ha sport Rosaria Arquint Gallo ils prüms seminaris da la Pro Manufacta Engiadina illas technicas tradiziunalas sco il sgrafit, quella dals tagliapedras e quella dal liar cudeschs. Quai sun tuot mansters chi

vegnan praticats in l'ün o l'oter chö in Engiadina Bassa.

Stil da vita perdüravel

D'incuort ha surtut René Fritsch l'affar da la Pro Manufacta Engiadina. Seis intent es da cuntinuar culla spüerta existenta e da tilla adattar davoman. «Ün'idea es da spordscher cuors da scriver texts culla scrittüra da la calligrafia», tradischia Fritsch. «O da far clinöz cun materials indigens», manzuna'l. Tenor el nu's poja dir chi detta ün tipic artischanadi da l'Engiadina Bassa: «Eir in otras regiuns as intaglia lain o as fuschina.» Sias spüertas as drizzan a giasts chi cultivan ün stil da vita perdüravel chi's fa valair illas citats grondas. Quellas personas as sfadian da retrar mangiativas in qualità da bio, ellas prouvan da cumpensar lur viadis fats culs eroplans, separan las immun-dizchas e vivan da maniera cha la prosma generaziun nun haja da surtort

dischavantags chaschunats da la societa. E precis quists novs trends vuol Fritsch trar a nüz per seis seminaris.

Svagliar ils sens

René Fritsch deriva da l'Argovia ed es ün mansteran paschiunà. Seis repertori da prodots tendescha da purtrets, mobiglia, glüms, coppas e bler oter plü. Cün s-chaffir sias creaziuns esa per el important da mantgnair l'artischanadi tradiziunal e la perdüravelzza. Seis motto es da doyrrar tuot ils sens per svagliar pro'ls conumans emozions. Daspö ün mez on es el regularmaing a Scuol. «Eu vaiva relaziuns personalas in Engadin'Ota ed uossa n'haja imprais a cugnuscher tuot la val», manzuna'l. Per el es Scuol ün lö bain situà ingio chi's riva svelta nanpro da mincha vart. «Da qua davent as poja eir planisar bain seis temp liber d'ürant ils seminaris», manaja'l. «E la regiun spordscha bleras atracziuns als giasts.» Intant ha'l gnü la

pussibilità da visitar ils cumüns vashins ed ha pudü discuurer cun blera glieud. «Cur ch'eu sun a Scuol am sainta simplamaing da chasa», constata'l. «Id es fich interessant che chi vain tuot fat in quista destinaziun da vacanzas.» Il plaschair per la regiun vuol el dar inavant a las participantas e'ls participants da seis cuors artischans.

Resguardar ils novs trends

Sias pretaisas personalas a seis arrandschamaints sun da svagliar las emozions. Quai vuol el far cull'agüd da las observaziuns fattas cun verer, cun palpar, cun tadlar e cun savurar. René Fritsch sviluppera seis seminaris e cuors cuntinuadamaing in resguardond ils plü novs trends. Fin uossa gnivan sports ils cuors cun lavurar la bunura e'l davomezdi staiva als participants a libra disposiziun. «Nov dess esser il cuntgnü da l'instrucziun plü focussà»,

disch el. «Ushè resta amo avuonda temp per giodair cun tuot ils sens la particularità da la regiun dal Parc Naziunal Svizzer», declera Fritsch. Chi chi ha interest ha plünavant la pussibilità da's participar al program da temp liber. Il mansteran paschiunà da l'Argovia disch da sai svesta ch'el saja ün all-rounder chi haja experienza da lavurar cun divers materials. «Perquai saja eir che infrastruttura chi fa dabsögn pels singuls cuors», manzuna'l. «Meis böet es d'avair scha pussibel personas da la regiun chi mainan ils seminaris», declera Fritsch. El ha plaschair da prodüer svesta prodots ed es persvas cha quai detta a minchün ün sentiment da cuntantezza. Las localitats dals seminaris restan eir suot sia guida ils medems sco pro'ls anteriurs proprietaris da la Pro Manufacta Engiadina. (anr/afi)

Ulteriuras infuormaziuns e las datas dals cuors chattan interessats sülla pagina d'internet: www.promanufacta.ch.